

12/09/2003

Media Barat iri hati kejayaan PM

UGUTAN majalah Amerika, Business Week untuk menyiarkan rencana yang memburukkan Perdana Menteri dan negara amnya selepas Datuk Seri Dr Mahathir Mohamad enggan ditemubual wartawannya, menunjukkan sikap besar kepala dan biadap media Barat. Kali terakhir Dr Mahathir setuju diwawancara, majalah dengan edisi rantau ini Business Week Asia itu, memutarbelitkan fakta dan menyiarkan pelbagai pembohongan. Surat daripada majalah itu dikirimkan kepada Perdana Menteri pada 8 September lalu mengugut akan menulis perkara yang tidak munasabah didakwa berlaku di negara ini seperti kronisme, penindasan dan pemerintahan kuku besi. Ia mahu Dr Mahathir menjawab semua perkara itu.

Sebagaimana biasa, majalah itu dimiliki penerbit Amerika seperti Asiaweek dan akhbar Asia Wall Street Journal (AWSJ) yang tidak syak lagi mempunyai agenda. Pada 5 April lalu, majalah Economist diterbitkan di London menyertai senarai media Barat yang celupar dan berniat jahat apabila menerbitkan siri rencana menghina dan mempersoal kewibawaan pucuk pimpinan negara dan Dr Mahathir. Selepas itu, pada 23 April lalu, AWSJ seperti sengaja salah menyiarkan gambar Dr Mahathir bagi laporan mengenai sabitan kesalahan dan hukuman terhadap Datuk Seri Anwar Ibrahim.

Enam bulan sebelum itu, AWSJ menggunakan bendera Malaysia untuk mengiringi berita mengenai kemerosotan ekonomi Indonesia sedang majalah miliknya Asiaweek dalam keluaran Januari, 2001, turut mempersendakan kemajuan dicapai negara dan menyiarkan laporan serong. Media Barat sebenarnya tidak menghormati kebebasan dan mahu mentafsir demokrasi mengikut acuan mereka. Mungkin kerajaan perlu bertindak menyekat pengedaran setiap majalah yang memusuhi dan mahu mensabotaj kita, selain menimbang tindakan melarang edaran majalah terbabit dalam usaha menentang pembohongan disebarakan pendakwah Barat.